

6. gr.

Nú gerist sveitarstjóri sekur um stórfellda og itrekaða vanrækslu og hirðuleysi í starfi og skeytir ekki áminningum hreppsnefndar, getur hún þá með fundarsamþykkt vikið honum frá störfum, en tilkynna skal hún félagsmálaráðuneytinu þessa frávikningu svo fljótt er við verður komið. Hreppsnefnd ákveður, hvort oddviti eða annar hreppsnefndarmaður taki við starfi sveitarstjóra og gegni því, þar til sveitarstjóri hefur verið ráðinn að nýju.

Samþykkt þessi, sem hreppsnefnd Eyrarhrepps hefur samið og samþykkt, staðfestist hér með samkvæmt lögum nr. 58 29. marz 1961, til þess að öðlast gildi þegar í stað.

Félagsmálaráðuneytið, 17. apríl 1967.

F. h. r.

Hjálmar Vilhjálmsson.

Hallgrímur Dalberg.

REGLUGERÐ

fyrir Bjargráðasjóð Íslands.

I. KAFLI

Sjóðurinn og tilgangur hans.

1. gr.

Bjargráðasjóður Íslands er sjálfstæð stofnun, er lýtur sérstakri stjórn, sbr. 4. gr., undir yfirstjórn félagsmálaráðherra.

2. gr.

Tilgangur Bjargráðasjóðs Íslands er að vera til hjálpar í hallæri eða til að afstýra því, en það telst hallæri, ef sveitarfélög verða af náttúruvöldum svo illa stödd, að þau megna ekki af eigin rammleik að forða mönnum eða skepnum frá harðrétti eða felli.

II. KAFLI

Heimili og varnarþing.

3. gr.

Heimili Bjargráðasjóðs Íslands og varnarþing er í Reykjavík.

III. KAFLI

Stjórn sjóðsins og verksvið hennar.

4. gr.

Stjórn sjóðsins, er nefnist Bjargráðastjórn, skipa: ráðuneytisstjórinn í félagsmálaráðuneytinu, sem er formaður stjórnarinnar, formaður Búnaðarfélags Íslands, forseti Fiskifélags Íslands og formaður Sambands íslenskra sveitarfélaga.

5. gr.

Bjargráðastjórn heldur reglulega fund að jafnaði einu sinni í mánuði og aukafundi, þegar mikilvægar beiðnir berast eða ráðherra óskar álits hennar eða tillagna.

6. gr.

Bjargráðastjórn skal vera ríkisstjórninni til ráðuneytis um ráðstafanir, sem miða að því að afstýra hallæri.

7. gr.

Bjargráðastjórn hefur á hendi alla stjórn sjóðsins. Hún tekur ákvarðanir á fundum varðandi styrkveitingar og lánveitingar þ. á m. lánstíma og tryggingar.

8. gr.

Bjargráðastjórn hefur umsjón með fjárreiðum og reikningshaldi sjóðsins. Bjargráðastjórn ræður framkvæmdastjóra sjóðsins, svo og annað starfsfólk eftir tillögum framkvæmdastjóra, og eftir því sem hún telur nauðsynlegt. Stjórnin getur sett framkvæmdastjóra erindisbréf.

9. gr.

Heimilt er Bjargráðastjórn að semja við stjórn Lánasjóðs sveitarfélaga um sameiginlega framkvæmdastjórn og afgreiðslu fyrir báða sjóðina, sbr. 4. gr. 3. málsg. laga nr. 35/1966, enda telji Bjargráðastjórn slíkt fyrirkomulag hagkvæmt fyrir sjóðinn.

10. gr.

Ráðherra ákveður þóknun stjórnarinnar, er greiðist úr sjóðnum.

IV. KAFLI

Verksvið framkvæmdastjóra.

11. gr.

Framkvæmdastjóri ber, í umboði stjórnarinnar, ábyrgð á fjárreiðum, reikningshaldi og uppgjöri sjóðsins og annast það, svo og daglega afgreiðslu á vegum sjóðsins ásamt öðru starfsliði hans.

12. gr.

Framkvæmdastjóri kemur fram sem fyrirsvarsmaður sjóðsins. Framkvæmdastjóri boðar stjórnarfundi og undirbýr mál fyrir fundi.

Framkvæmdastjóri getur, í samráði við sjóðstjórn, sett öðru starfsfólki sjóðsins erindisbréf.

13. gr.

Kaup og kjör framkvæmdastjóra og annars starfsfólks sjóðsins skal vera í samræmi við launakerfi opinberra starfsmanna.

Starfsfólk sjóðsins hefur skyldur og nýtur réttinda opinberra starfsmanna.

V. KAFLI

Tekjur sjóðsins.

14. gr.

Árlegar tekjur Bjargráðasjóðs eru:

1. Framlag sveitarfélaga, er skal vera kr. 10.00 fyrir hvern íbúa sveitarfélagsins samkvæmt íbúaskrá þjóðskrárinnar 1. desember næsta ár á undan.
2. Framlag ríkissjóðs, er nemur kr. 10.00 á hvern íbúa landsins samkvæmt íbúaskrá þjóðskrárinnar, sbr. 1. tl.
3. Vextir af fé sjóðsins.
4. Lántökugjald 1% af lánveitingum samkvæmt 18. gr. b- og c-liðum.

15. gr.

Sveitarstjórn skal ljúka framlagi til Bjargráðasjóðs, sbr. 14. gr. 2. tl., á manntalsþingum. Sýslumenn og bæjarfógetar (í Reykjavík tollstjóri) skulu innheimta gjaldið og skila því til sjóðsins eigi síðar en 1. október ár hvert.

Framlag ríkissjóðs, sbr. 14. gr. 2. tl., greiðist sjóðnum fyrir 30. júní ár hvert.

VI. KAFLI

Deildaskipting.

16. gr.

Bjargráðasjóður starfar í tveimur aðgreindum deildum, er nefnast **séreignasjóður** og **sameignarsjóður**:

1. **Séreignasjóðurinn** er eign sýslu- og bæjarfélaga landsins, og rennur í hann helmingur þess framlags, sem bæjarfélög og sveitarfélög innan hverrar sýslu greiða árlega til Bjargráðasjóðs.

Séreign hverrar sýslu og hvers kaupstaðar skal færð á sérstakan reikning, er ber nafn viðkomandi sýslu og kaupstaðar. Helmingur árlegra framlaga skal færður á sérreikning viðkomandi sýslu eða bæjarfélags. Vextir af innstæðum skulu lagðir við höfuðstól hverrar sýslu og kaupstaðar í árslok. Reikningar sýslna í séreignasjóði skulu sýna, hver upphæð greiðist árlega frá hverju einstöku hreppsfélagi í hverri sýslu.

Þegar sýslu er skipt eða kaupsún fær kaupstaðarréttindi, skal skipta séreign hins forna umdæmis samkvæmt þeirri skiptitölu, sem notuð er við skipti á öðrum eignum umdæmisins og samþykkt hefur verið af báðum aðilum eða ákveðin af félagsmálaráðherra. Hið nýja umdæmi fær þá sérreikning við sjóðinn.

2. **Sameignarsjóðurinn** er sameign allra landsmanna. Í hann rennur framlag ríkissjóðs óskipt, svo og helmingur af framlagi sveitarfélaga. Í hann renna og vextir af innstæðum og verðbréfum sjóðsins.

Úr sameignarsjóði greiðist allur kostnaður við stjórn sjóðsins og starfsemi.

VII. KAFLI

Lán- og styrkveitingar.

17. gr.

Fé séreignasjóðs má aðeins ráðstafa, svo sem hér segir:

- a. Veita einstökum bæjar- og sveitarfélögum styrk af séreign þeirra, ef hallæri ber að höndum, enda geri umdæmið tilkall til séreignar sinnar til útbýtingar samkvæmt reglum, sem það hefur samþykkt og ráðherra fallizt á, að fengnu álitni Bjargráðastjórnar. Senda skal skýrslu um úthlutun þessa til Bjargráðastjórnar, þegar að úthlutun lokinni.
- b. Veita einstökum bæjarstjórnnum eða sýslunefndum vaxtalaus bráðabirgðalán af séreign sinni til að kaupa vetrarforða, þegar svo stendur á, að haustbirgðir reynast svo litlar í umdæminu, að hætta er á bjargarskortri fyrir menn og skepnur, ef illa vetrar. Slík lán skulu endurgreiðast innan eins árs.

18. gr.

Fé sameignarsjóðs er Bjargráðastjórn heimilt að verja, svo sem hér segir:

- a. Til að veita styrki til einstaklinga og sveitarfélaga, sem verða fyrir tjóni af náttúruvöldum, er eigi fæst hætt á annan veg.
- b. Til að veita (vaxtalaus) lán til sveitar- og sýslufélaga svo og einstaklinga, til að endurlána einstaklingum í umdæminu, ef um er að ræða hallæri í umdæminu

vegna óvenjulegra harðinda, langvarandi aflaleysis eða vegna tjóna af náttúruvöldum á mannvirkjum eða búfé, enda hafi ekki verið vátryggt fyrir tjóninu.

- c. Til að veita sveitarfélögum, fyrirtækjum þeirra eða Lánasjóði sveitarfélaga lán, ef handbært fé sjóðsins verður meira en ætla má nauðsynlegt til greiðslu styrkja eða lána samkvæmt a- og b-liðum þessarar greinar gegn ábyrgð ríkissjóðs eða annarri öruggri tryggingu.

19. gr.

Bjargráðastjórn getur sett almenn skilyrði fyrir styrk- eða lánveitingum samkv. 18. gr. a- og b-liðum s. s. að styrkir og lán skuli ekki veitt vegna tjóna, sem hægt var að tryggja fyrir og að styrkir og lán miðist við ákveðinn hluta af tjónsupphæð.

20. gr.

Lán samkvæmt 18. gr. b-lið (A-lán) skulu jafnan vera vaxtalaus. Bjargráðastjórn ákveður vexti í samræmi við almenna útlánsvexti banka af lánum samkvæmt 18. gr. c-lið (B-lánunum).

Bjargráðastjórn ákveður lánstíma vegna lánveitinga samkvæmt 18. gr. b- og c-liðum. Lánstími má þó ekki vera lengri en 10 ár, nema sérstakt leyfi félagsmálaráðherra komi til, ef um er að ræða stórfellt tjón af náttúruvöldum, sem ekki verður bætt nema á löngum tíma.

21. gr.

Lán til einstaklinga samkv. 18. gr. b-lið skulu tryggð með ábyrgð sveitarfélags eða annarri öruggri tryggingu.

Lán samkv. 18. gr. c-lið skulu tryggð með ríkisábyrgð eða annarri öruggri tryggingu.

Heimilt er Bjargráðastjórn að setja það að skilyrði fyrir lánveitingu samkv. 18. gr., að sveitarfélag vísi til tryggingar greiðslum afborgana (og vaxta) lána á greiðslur úr Jöfnunarsjóði sveitarfélaga.

22. gr.

Einstaklingar, sveitar- og sýslufélög, sem óska styrkja eða lána úr sjóðnum samkv. 18. gr., skulu senda sjóðstjórninni skriflega beiðni. Skulu beiðninni fylgja svo glöggar skýrslur, sem unnt er um tjónið. Jafnframt skulu fylgja beiðninni vottorð eftir því, sem við á: héraðsráðunautar, dýralæknis, dómkvaddra matsmanna, oddvita eða hreppstjóra, svo og samþykki sveitarstjórnar eða sýslunefndar ásamt greinargerð, ef sveitar- eða sýslufélag á í hlut.

Bjargráðastjórn getur krafizt fyllri gagna, ef ástæða þykir til, frá umsækjanda og öðrum þeim aðiljum, sem slíkar upplýsingar geta veitt, og er þeim skylt að veita þær, svo sem föng eru á.

Bjargráðastjórn getur frestað afgreiðslu eða synjað umsóknum um lán eða styrki, ef ekki eru lögð fram þau skilríki, sem krafizt er, eða hún telur tjón ekki nægilega upplýst.

Umsóknir um styrki og lán samkv. 18. gr. a- og b-liðum skulu hafa borizt Bjargráðastjórn ekki síðar en innan þja mánaða frá því tjón varð.

23. gr.

Fé Bjargráðasjóðs, sem ekki hefur verið ráðstafað samkvæmt 18. gr., skal ávaxta í banka eða sjóði með ríkisábyrgð.

24. gr.

Nú hrekkur fé sjóðsins eigi til að veita þá aðstoð, sem nauðsyn krefur, sbr. 18. gr. og er þá ríkisstjórninni heimilt að ábyrgjast nauðsynleg lán fyrir sjóðinn eða veita honum lán úr ríkissjóði. Tryggja má slík lán með veði í eignum og tekjum sjóðsins.

VII. KAFLI

Reikningar og endurskoðun.

25. gr.

Ársreikningar sjóðsins skulu fullgerðir fyrir lok febrúarmánaðar ár hvert og þá lagðir fyrir Bjargráðastjórn til samþykktar.

Ríkisendurskoðunin endurskoðar reikninga sjóðsins og skal þeirri endurskoðun lokið fyrir lok aprílmánaðar ár hvert. Úrskurður endurskoðunarinnar skal lagður fyrir stjórn sjóðsins. Reikningar sjóðsins skulu birtir í B-deild Stjórnartíðinda.

Reglugerð þessi, sem samin er af Bjargráðastjórn, staðfestist hér með samkvæmt lögum nr. 8 14. febr. 1961, um Bjargráðasjóð Íslands, til þess að öðlast gildi þegar í stað, og birtist til eftirbreytni öllum þeim, sem hlut eiga að máli.

Jafnframt er úr gildi felld reglugerð nr. 189 2. nóv. 1951 fyrir Bjargráðasjóð Íslands.

Félagsmálaráðuneytið, 18. apríl 1967.

Eggert G. Þorsteinsson.

Hjálmar Vilhjálmsson.

S A M Þ Y K K T

fyrir Veiðifélag Gljúfurár í Mýrasýslu.

1. gr.

Félagið heitir Veiðifélag Gljúfurár í Mýrasýslu. Heimili þess og varnarþing er í Borgarnesi.

2. gr.

Félagið nær til allra jarða, er land eiga að Gljúfurá frá Klaufhamarsfossi að ármótum hennar og Norðurár að undanskildu Hópi og að- og frárennsli þess (Skarðslæk og Hópstokk), en þær eru:

1. Grísartunga í Stafholtstungnahreppi.
2. Sauðhússkógur í Stafholtstungnahreppi.
3. Stóru-Skógar í Stafholtstungnahreppi.
4. Litlu-Skógar í Stafholtstungnahreppi.
5. Haugar í Stafholtstungnahreppi.
6. Sólheimatunga í Stafholtstungnahreppi.
7. Svignaskarð í Borgarhreppi.
8. Fróðhús í Borgarhreppi.
9. Gljúfurá í Borgarhreppi.
10. Tandrasel í Borgarhreppi.
11. Ferjukot í Borgarhreppi.